

E kia kore ra e rauka iaia tana i akakoro ra i te ta, ka akavaia aia, e e utunga mataiti tana, okotai mataiti i te tapeka anga, ma te rave i te angaanga a te Ariki i akatakaia nana, ei roto aia i te are tapeka anga moe ei i te po.

Kareka kia ta tetai tangata i tetai tangata e mate rava atura, ma te akakoro e e inangaro ta tikai nona i taua tangata ra kia mate, ka akavaia aia. Tera tana utunga, kia mate aia, no te mea kua ta aia i te tangata kia mate.

E kia rai te riri o taua tangata i akakoroia ra e ta, i te mou i te matipi o tei ta atu iaia ra, e mate atura taua tangata ra i te taia eia, kare aia e akautungaia.

Kia ta tetai tangata i te metua tane e te metua vaine, e mate takiri atura i te taia eia, ka akavaia aia. Tera tana utunga, kia mate aia.

TURE III.—NO TE TOKI TOPA.

Kareka kia topa te toki me tipuia ki te rakau, e topa atura taua toki ra ki runga i te tangata, e motu atura te tangata i taua toki ra, e mate takiri atura, kare te tangata i tipuia i taua toki ra ki te rakau i akakoro e, e ta iaia kia mate, kia tipu aia i te toki ki te rakau, topa atura te toki ki te tangata, mate atura. I na ra ko tana utunga kare ia e tau ki te utunga a te ta tangata, tera ua tana, e akautungaia i te moni, e 20 dala, ei akamaru i te ngakau o te kopu tangata o te tangata i mate, e kia kore e mate, e puta maata ra, 10 dala, e puta mea ngiti anake e 5 dala.

Pera katoa tei puta i te pupui, e pupui manu tikai, te tu ra ki te tangata e mate atura, no te mea kare i akakoro e ka pupui ki te tangata.

Okotai rai tu i tei reira tuatua mei tei tataia i te toki topa. E akautungaia aia i te moni e 20 dala ei akamaru i te ngakau o te kopu tangata o te tangata i mate.

Pera katoa tei puta i te auri ko ika ki roto i te tai, e ika tana i ko ki te auri, te tu ra ki te tangata e mate atura, kare aia i akakoro e, e ko i te tangata, ki te auri kia mate, ko te ika ra, ko tana ia i ko. E akautunga katoaia aia i te moni e 20 dala, ei akamaru i te ngakau o te kopu tangata o te tangata i mate ra.

Pera katoa tei pà i te toka pei puaka, kare i pei ki te tangata, e puaka tikai tei peiia, e pepê atura ki te tangata, e mate atura, kare aia i akakoro e, e pei ki te tangata kia mate. E akautunga katoaia aia i te moni, e 20 dala ei akamaru i te ngakau o te kopu tangata o te tangata i mate; kareka tei te metua, ko tei reira ia, tei te vaine ma nga tamariki, ko te reira ia.

TURE IV.—NO TE TA'U ARE.

Kia ta'u tetai tangata i te are, e ka atura te apinga i roto i taua are ra, ma te tangata katoa, ka akavaia aia, tera tana utunga, e tau iaia te mate.

E kia ka ua tetai are i te ai; kare taua tangata ra i akakoro tikai e ta'u, no te mea ra e ai topa ua nana, ka atura ki te are, ma te au apinga katoa i roto. E akavaia aia. Tera tana utunga e 20 dala, ka riro taua moni ra na te tangata nona te are tei ka.

Ko te tangata ra e akakoro tikai e ta'u i te are, e ka atura te are e te apinga i roto, e kare e tangata i ka, ka akautungaia aia, tera tana utunga, e tapekaia aia i te auri e rua mataiti, e tona katoa kainga ka riro i te tangata nona te are i ta'unaia e ia, kia kore ra e kainga, e toru mataiti i te tapeka anga, ei reira aia e tukuia i kia aere.

TURE V.—NO TE KAI KAINGA.

Kareka kia kai kainga tetai ariki, ma tetai ariki, ka kimiia tei reira tuatua, kia taka takai te tika anga i ta tetai e te tika kore anga i ta tetai, e taka iora te tuatua, e no tetai ariki te kainga, e kia mào mai tetai, e mào uaorai, e kia rai te mào anga mai; na nga ariki ravarai te reira e kimi, e kia taka meitaki tikai, na ratou ravarai e kimi i te utunga e tau na taua ariki ra. E kia kore e mào, kia tu tai, e kia tu rua, e ako ua atu iaia i reira. E kia tu toru ra, ka akavaia aia i reira, ka oki rai te kainga no te tangata kainga. Tera te utunga a te ariki kai kainga, e te mataiapo kai kainga, e te rangatira kai kainga, e 20 dala.

TURE VI.—NO TE TANE NOO VAINÉ, E TE VAINÉ NOO TANE.

Kai keia tetai tangata i te vaine noo tane, ka akavaia aia. Tera tana utunga, e 20 dala, ka va'i ia taua utunga ra, na te ariki tetai pae, na te tangata vaine tetai pae, akapera katoa kia keia tetai vaine i te tane noo vaine.

NO TE TANE TAKAUA ME KEIA I TE VAINÉ NOO TANE.

Kia moe te tane takaua i te vaine noo tane, ka akavaia aia, tera tana utunga, e 20 dala. Pera katoa te vaine takaua kia keia i te tangata noo vaine ra, e 20 dala.

NO TE TANE TAKAUA, E TE VAINÉ TAKAUA.

Kai keia te tane takaua e te vaine takaua, ka akavaia raua, tera ta raua utunga, e 8 dala, e 4 a te tane, e 4 a te vaine.

Teia te au apinga e tau ki te au utunga ravarai, me kore e moni, ei apinga memaitaki tikai, e te pakari; mei tei tau ki te 8 dala, &c.

Kia kore takiri te au apinga e rauka, ka tukuia ki te vaere i te purumu e te ta'u ngaika, e te tipu vaie, e te tari mai.

TURE VII.—NO TE KEIA E TE KO PUAKA.

“Auraka rava koe e keia.”—Ex. xx. 15.

1. *No te Keia Puaka.*—Kia keia tetai tangata i te Puaka, okotai tangata i keiaia'i, ka akavaia aia. Tera tana utunga, e 4 puaka mei te puaka i keia ia te maata, ka tua taua utunga ra, na te ariki tetai, na te au akava tetai, na te tangata puaka e rua, me kore e puaka meitaki e moni ia, mei te oko tikai o taua au puaka e 4 ra, mei te mea e, kau piri mai tetai tangata ki te opukinga i